



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

30. Kalenderwoche – ab 26. Juli 2009

Zu einer endlosen Geschichte hat sich die Planungs-Odyssee für einen Brunnen am Chemnitzer Marktplatz gestaltet. Sachsenmeyer macht sich wie immer seine eigenen Gedanken zum Thema und hat sogar einen eigenen Vorschlag zur Brunnengestaltung parat....

Brunnen offm Margd

Nee, jedz dud das widdor losgehn mid dähm Brunn offm Margd! Ja, da had eenor Langeweile gehabbd un nu is de Disgussjohn widdor losgegang. Brunn odor nisch Brunn? Un welschor Brunn? Dähr Brunn dähr damals gewonn hadde – dähr Dassn-Brunn? Odor e ganz andror Brunn – villeischd eenor mid vorschdeenorde Beeme vom Schdeenornen Wald?

Es is ja dazumals sähr gnabb gewähsn – eene Egsberdnkgommissjohn hadde ja dähn Brunn mid die Dassn auserwähld. Wenns nach die Gunsdegsberdn gegang sein däde, da häddn mir werglisch offm Margdbladz in Gemnidz dor Weld gezeischd, dass mir Gemnidzor nisch mähr alle Dassn im Schrank hamm. Guhd, e bißl Selbsdgridigg kann nischd schadn, abor so direggd muss mor seine Schwäschn dor Weld nisch zeischn. Das dud ja schon an Endbleeßung gränzn.

De Schdadträhde hamm damals dähn Dassn-Brunn vorhindord. Un isch dachde eischendlich, dass dähr Gälsch endgildisch an uns vorbeigegang is, abor dengsd! Irschendeenor von die Zeidungsleide had de Disgussjohn widdor endfachd. Wahrscheinlich wäschn dähm Sommorloch. Nischd los, was se in dor Zeidung bring kenn. Un diesn Sommor is ja ooch noch keene Schnabbschildgrehde ausgebiggsd. Un och kee annersch Vieh. Da sinn die ehm widdor off dähn Brunn gekomm.

Wobei – so e Brunn offm Margd... also, isch däde das eischendlich ooch ganz scheen finden. Fasd

alle Schädte, die was off sisch haldn dun, hamm offm Margd een Brunn. Daderbei sinn die ganz aldn Brunn ja noch rischdisch fiehr de Wassorvorsorschung dor Leide gedachd gewähsn. Aus so eim Brunn hamm de Leide dazumals mid Eemorn ihr Wassor gehold. Heidzudaache is e Brunn mähr e Schmuggschdig. Odor fiehr Abgiehlung bei heeße Daache, wo mor ma de Beene neinhäng kann.

Un das mid die vorschdeenordn Beeme... das is ja ma werglisch eene Idee, die zu Gemnidz bassn däde. Wo mir werglisch was vorzeischn kenn, was annre nisch hamm! Nisch mähr alle Dassn im Schrank hamm ja hingeeschn nisch bloß mir Gemnidzor nisch.

Ja, e Brunn mid vorschdeenorde Beeme kenndsch mir eschd guhd vorschdelln. Friehor hamm die vorschdeenordn Boomschdämme doch ooch im Frein am Muhsäum geschdandn. In Wind un Weddor. Das had dähnen doch nisch viel ausgemachd. Odor? Nascha, das muss nadiehrlich jemand nachbriefn, dähr rischdisch Ahnung hamm dud. Odor... also, eene Idee hädsch ooch noch. Die wolln doch dähmnäschs eene Loggomodieve vom Hardmann dursch de Schdadt zum Bahnhof schlebbn. Zur Erinnerung an dähn Hardmann. Un wennse nu die Loggomodieve hinnorhähr offn Margd schdelln dädn... e bißl e Blanschbeggn ringsrumm... un das Wassor dud dann bei dähr Loggomodieve ohm ausm Schornschdeen rausrießln... un zu jedor volln Schdunde däde die Log bfeifn... - das kenndsch mir ooch eschd scheen vorschdelln.

Eduard Sachsenmeyer